

**Liow: Terpulang Kepada PM Tentukan Jumlah Kerusi Kabinet**  
**mStarOnline**  
**Februari 23, 2013**

**KUALA LUMPUR:** Presiden MCA, Datuk Seri Liow Tiong Lai berkata, parti itu menyerahkan kepada Perdana Menteri, Datuk Seri Najib Tun Razak untuk menentukan tarikh dan jumlah kerusi Kabinet yang akan diberikan kepada MCA.

Menurut beliau, MCA kini bersedia untuk kembali menyertai Kabinet selepas perwakilan parti itu meluluskan resolusi untuk menerima jawatan dalam kerajaan di semua peringkat.

Liow berkata demikian bagi menjawab soalan wakil media mengenai sama ada parti itu berhasrat untuk mengekalkan empat jawatan menteri yang diberikan kepada mereka sebelum ini.

Tambah Liow, beliau berterima kasih kepada perwakilan pusat kerana memberi mandat tersebut yang akan menjadi perangsang kepada kepimpinan baru parti itu dalam usaha melakukan transformasi.

Keputusan mesyuarat agung luar biasa (EGM) MCA menyaksikan hampir semua 1,982 anggota perwakilan pusat, yang menghadiri mesyuarat itu di Wisma MCA, mengundi dengan cara mengangkat tangan.

Daripada jumlah itu, hanya lima orang yang membantah usul resolusi untuk menerima jawatan kerajaan di semua peringkat, manakala empat lagi enggan mengundi.

Hakcipta Terpelihara © 1995-2013 Star Publications (Malaysia) Bhd

Source:

[http://mstar.com.my/berita/cerita.asp?file=/2014/2/23/mstar\\_berita/20140223164733&sec=mstar\\_berita](http://mstar.com.my/berita/cerita.asp?file=/2014/2/23/mstar_berita/20140223164733&sec=mstar_berita)